

四庫全書

子部

欽定四庫全書

子部

山堂肆考卷一百

四十至
四十二

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣陸

湘

臚錄監生臣陸

澧

澧

欽定四庫全書

山堂肆考卷一百四十

明

彭大翼

撰

人事

姓氏

史記注天子賜姓命氏諸侯命族族者氏之別名也姓者所以統系百世使不相別也氏者所以別子孫之所自出故世本之篇言姓則在上言氏則在下又通志三代之前姓氏分而爲二男子稱氏婦人稱

姓氏所以別貴賤故貴者有氏賤者有名無氏姓所以別婚姻故有同姓異姓庶姓之別三代之後姓氏合而爲一於文女生爲姓故姓之賜多從女姬姜嬴姁姚媯姑妘媯始姁嫪之類是一說大抵姓可呼爲氏氏不可呼爲姓

同姓

舜紀五帝三王自黃帝至舜禹皆同姓而異其國號以章明德故黃帝爲有熊顓頊爲高陽帝嚳爲高辛帝堯

爲陶唐帝舜爲有虞禹爲夏后而姓姒氏契爲商而姓
子氏稷爲周而姓姬氏又宋呂東萊曰孟仲季臧同出
於魯也淤國封印公父伯張同出於鄭也向華蕩樂鱗
魚仲老同出於宋也樂高崔國叔仲東郭同出於齊也
異姓

左隱十一年滕侯薛侯來朝爭長公使羽父請於薛侯
曰周之宗盟異姓爲後

以封爲氏

文王封子時叔於沈其後爲沈氏太公望本姓姜氏封於呂故曰呂尚武王封泰伯曾孫於閭其後爲閭氏晉穆侯封少子成師於韓其後爲韓氏晉獻公封畢萬於魏其後爲魏氏宋公子段食於褚其後爲褚氏宋太公食於蕭其後爲蕭氏楚貴皇食於苗其後爲苗氏晉叔向食於楊其後爲楊氏杞之後食於婁故爲婁氏越之後食於歐山之陽故爲歐陽氏

以官爲氏

春秋時祭仲初爲祭封人守封疆者後以爲氏漢孝文時居官者長子孫遂以官爲氏若倉氏庫氏則倉庫吏之後也

以字爲氏

左隱八年無駭卒羽父請諡與族公問族於衆仲衆仲對曰天子建德因生以賜姓昨之土而命之氏諸侯以字爲諡因以爲族官有世功則有官族邑亦如之公命以字爲展氏朱子語錄以字爲諡竊恐諡本氏字如鄭

之國氏本子國之後駟氏本子駟之後如此之類所謂以字爲氏因以爲族也

以名爲氏

陳伯袁之後爲袁氏齊公子高之後爲高氏衛公子惠孫之後爲孫氏宋公子樂父之後爲樂氏宋司寇牛父之後爲牛氏魯閔子騫之後爲騫氏

賜氏以國

潛夫論凡氏之興九事賜氏以國齊魯宋衛也賜氏以

諡戴武宣穆也賜氏於號唐虞夏商也賜氏以官若司
寇司馬賜氏以爵若王孫公孫賜氏以字若孟孫叔孫
賜氏以居若東門西門三鳥五鹿以忠賜也巫氏匠陶
以事賜也

賜氏以生

唐張說曰古未有姓如夷狄然自炎帝之姜黃帝之姬
始因所生之地而賜之姓又朱子語錄如舜生於姚汭
武王遂賜陳胡公滿為媯姓此卽所謂因生以賜姓也

三大姓

戰國時楚三大姓昭屈景齊二大姓懷與田也

三右姓

六帖唐貞觀氏族志以第一等爲右姓路氏著姓略以盛門爲右姓柳沖姓族系錄以四海望族爲右姓

四姓

唐柳芳論曰尚書領護而上爲甲姓九卿若方伯者爲乙姓散騎常侍大中大夫爲丙姓吏部正員外郎爲丁

姓凡得入者謂之四姓國史補四姓者滎陽鄭岡頭盧澤底李土門崔皆爲鼎甲又太原王亦四姓之匹

五姓

六帖以崔盧李鄭爲四姓加太原王氏號爲五姓

賜姓劉

漢婁敬勸漢高祖都長安賜姓劉又漢初項他項伯項襄皆項籍之族亦賜姓劉

賜姓金

漢金日磾本匈奴休屠王之子武帝賜姓金

賜姓李

唐李世勣本姓徐武德二年從李密歸朝廷詔授勣黎
州總管封英國公賜姓李附宗正屬籍又李元紘本姓
丙賜姓李爲雍州司戶

賜姓宿

北史宿石朔方人祖若根魏明元時賜姓宿氏石尚公
主

封松爲姓

古今姓纂秦始皇遇雨止松下封松爲五大夫後人因氏焉

指李爲姓

老子生於李樹下遂指李爲姓

馭馬爲姓

漢馬援其先趙奢爲趙將能馭馬號馬服君其後子孫因以爲姓

埋羊爲姓

羊祜傳昔有攘羊遺叔向母母埋之後事發檢羊肉惟舌存焉因以羊舌爲氏

推律定姓

漢京房字君明本姓李氏因推律自定爲京氏

筮易得姓

唐陸羽不知所生或言有僧得之水濱畜之旣長不知其姓以易自筮得蹇之漸曰鴻漸于陸其羽可用爲儀

遂以陸為氏羽為名而字以鴻漸

去邑為朱

周封高陽之後于邾後為楚所滅子孫乃去邑而氏朱
去邑為于

周武王封子邾叔子孫以國為氏去邑而氏于

改姓墨氏

孤竹君本姓墨台氏名初字子朝殷湯封為孤竹君孤
竹者北方國名其後去台字改姓墨氏

改姓員氏

員半千狀云本姓劉氏彭城輿里人宋宗室營陵侯劉遵考子起部郎凝之後齊受宋禪凝歸北魏以忠諫比伍員改姓員氏賜名懷遠官至荊州刺史懷遠六代孫是為半千

改姓源

源乾曜本秃髮傳檀之子賀入後魏太祖謂曰朕與卿同源可改源氏

改姓勃

梁武帝改豫章王綜為勃氏

改姓尉

古有尉繚著書號曰尉繚子河南官氏志魏孝文改為尉元魏朝有尚書令尉元字苟仁者是其後也

改姓帥

晉尚書師曷避司馬師諱改姓帥

改姓王孫

左哀公十一年吳將伐齊越子率其衆以朝焉王及列士皆有饋賂吳人皆喜唯子胥懼曰是豢吳也夫諫弗聽使於齊屬其子于鮑氏為王孫氏

改姓獨孤

獨孤其先本姓劉至後魏在北有三十六部中有改為獨孤氏者

改姓王氏

黃帝時有公玉帶造明堂後改為王氏漢王況字文伯

者是其後也

改姓元氏

南中多危姓有惡其稱者或改為元氏

田改為車

漢車千秋本齊田氏以年老得乘小車出入省中時人謂之車丞相子孫因以為氏

黃改為胡

東漢胡廣本姓黃五月五日生父棄之胡公見而舉之

遂姓胡

慶改為賀

賀姓本齊公族慶封之後漢侍中慶純避安帝諱改為賀氏

木改為太

端木本賜之後因避仇改姓太氏

氏改為是

吳志是儀字子羽本姓氏孔融嘲之曰氏字民無上可

改為是因改焉

沈改為尤

閩人避王審知諱而沈氏去水而為尤

奚改為嵇

晉嵇康其先姓奚避怨徙浙家於嵇山之側易而為嵇
仲改為种

東漢順帝朝种暠其先仲山甫之後因避難改姓种

喬改為陳

晉陳元達字長宏本姓喬以生日妨父改姓陳

避難為東

晉東皙字廣微本漢陳廣之後曾孫孟達避王莽亂自東海徙涉鹿山西因去足為東氏

避仇為棗

潁川棗據字道彥本姓棘子成之後也因避仇改為棗仕晉為山陰令遷尚書左丞父叔偉仕魏為鉅鹿太守子腴以文章顯仕晉為襄城太守

郕改為成

成姓本周文王第五子郕叔武之後子孫以國為氏後
郕為楚所滅子孫去邑改為成周卿士成桓公肅公楚
大夫成得臣皆其後

郕改為兒

邾武子封次子于郕失國子孫避仇改為兒

改凡為汜

東漢有汜宮本姓凡因遭秦亂避地汜水故改姓焉

改許為干

干大本許旌陽後也得僊道改姓干夫妻偕隱西山

改共為洪

洪本古共工之後因避仇改姓洪

改姒為越

越本夏少康之後姓姒越王句踐裔孫無疆為楚所滅
子孫遂以國為氏又河南官氏志越疆氏改為越氏

籍改為席

唐席豫本出安定本晉大夫籍之後十三代孫瓌避項羽名改姓席氏

慎改為真

宋真德秀本姓慎避孝宗諱改姓真

改王為蟒

唐武后殺廢后王氏及良娣因改王后姓為蟒改良娣姓為梟

改暨為周

唐暨冕與弟昱上元中準制改為周

改敬為文

聞見後錄文潞公本姓敬其曾大父避石晉高祖諱更
姓文至漢復姓敬入宋朝其大父避翼祖諱又更姓文
改范為朱

宋范仲淹三歲而孤隨母改適長山朱氏冒姓朱氏後
舉進士復改本姓故謝啓云志在投秦入境遂稱于張
祿名非霸越乘舟乃效于陶朱

冒姓灌

漢張孟為灌嬰舍人得幸進之二千石蒙姓灌氏

冒姓衛

漢衛青父鄭季給事陽信公主家奴與衛媼通生青冒姓衛

冒姓孫

漢夏侯嬰滕公嘗隨母養外家冒姓孫氏

冒姓曹

魏曹操本姓夏侯父嵩為中常侍曹騰養子冒姓曹氏

冒姓安

見誕育

冒姓秦

宋秦檜無子取妻兄王煥孽子嬉養之冒姓秦

冒姓鄭

唐鄭注本姓魚冒為鄭故當時號為魚鄭及用事人號

為水族

冒姓駱

唐李元亮本姓安少為駱奉先養子冒姓駱

冒姓劉

五代劉知遠其先沙陀部人冒姓劉

冒姓石

五代石敬瑭其父臬捩雞本出西夷冒姓石

冒姓令狐

唐令狐綯作相遠近趨之至有姓胡冒姓令狐者

冒姓鮮于

見宗族

訛為慕容

前燕錄魏初莫護跋率部落入居西遼時燕代多冠步
搖諸部因謂之步搖後音訛為慕容且以為氏

訛為辛氏

唐辛替否本夏啓封支子于莘辛莘聲相近遂訛為辛
氏又柳子黃溪記大宜之川山舒水緩有土田始黃神

為人時居其地傳言者曰黃神王姓莽之先也莽既死
神更號黃氏逃來擇其深峭者潛焉故莽嘗言曰余黃
虞之後也因號其女曰黃皇室主黃王聲相近又有本
其所以傳言者益驗

號訛為郭

周文王季弟號叔受封于號或謂之郭因以為氏公羊
傳云號謂之郭聲之誤也

伶訛為冷

古伶倫之後音訛為冷漢書冷豐冷褒等是其後也

同姓名

附改姓名冒姓名
賜姓名隱姓名

歷代源流古者諱名不諱姓姓所同也名所獨也自有氏姓以來而名亦未嘗不立焉所以示有別也

兩曾參

戰國策有與曾子同姓名者而殺人人告曾子之母
曰吾子不殺人織自若有頃人又曰曾參殺人其母尚
織自若也頃之又一人告之曰曾參殺人其母懼投杼

踰垣而走

兩舅犯

一在晉文公時一在晉平公時

四王喬

一周時吹笙一漢明帝時飛鳥一蜀人食肉芝一犍為
武陽人居緱氏僊人庵

三邵平

邵平有三人一為秦東陵侯種瓜者一為陳勝徇廣陵

者見項羽傳一為齊王相者見齊哀王傳皆戰國時人
五公孫弘

公孫弘有五一在齊為孟嘗君見秦昭王一在中山為
參乘言司馬喜相求一在越斷髮為王騎一為漢平津
侯一在明帝時為幽州從事交通楚王英

兩朱買臣

一武帝時為會稽太守一元帝時為武昌太守

兩貢禹

漢高祖時有謁者貢禹章帝時亦有之

兩張禹

漢張禹字子文河內軹人元帝朝拜相封安昌侯又一張禹字伯達襄國人安帝朝為太傅封安鄉侯

兩王褒

漢宣帝時有王褒為諫大夫元帝時又有尚書左僕射王褒

兩李充

一漢殤帝時人字大遜兄弟同衣遜食後徵為博士一
晉時人字弘度善隸書妙參鍾索征北將軍褚裒引為
參軍以家貧求出外除剡縣令仕至侍中

兩陳咸

漢太尉陳咸字子康相人御史中丞萬年子也又一陳
咸汝人咸哀間尚書

兩王商

俱漢成帝外戚一為丞相封樂昌侯一為大司馬封成

都侯

兩韓信

漢高帝時兩韓信一封楚王一封韓王

兩李膺

東漢李膺字元禮人有被其容悅者名為登龍門梁李膺為蜀使至郡武帝悅之問曰今李膺何如昔李膺對云云

兩張衡

東漢張衡嘗作二京賦四愁詩隋煬帝時御史大夫張衡帝嘗幸其宅後帝營汾陽宮衡進諫比年勞役願嘉損抑帝意不平出為榆林太守

兩楊震

一東漢人明經博覽號關西夫子延光中為太尉一趙宋代州崞人弓馬絕倫討方臘有功知麟州建寧寨靖康初夏人圍建寧矢盡力乏與子居中執中俱力戰死唯長子存中從征河北獨免

兩鄭衆

一鄭衆字仲師漢明帝遣使匈奴虜欲令拜不為屈曰
不忍令大漢節對氊裘獨拜一章帝朝宦官字季序每
頒賞則辭多受少

兩史岑

一字子孝在王莽之末一字孝山在和熹之際

兩李通

光武時固始侯李通魏武時都亭侯李通

兩江革

一字次翁為漢中郎將一字休映為梁御史中丞

兩莊蹻

楚有兩莊蹻一莊王時大盜一莊王裔孫將兵平滇遂

自王

兩王莽

兩王莽俱漢時人一為右將軍一為大司馬篡位者

兩王孫賈

一為衛大夫一為齊大夫

兩李光進

俱唐代宗時人一為光弼弟一為光顏兄

兩陳賈

一見孟子一宋孝宗時監察御史請禁道學

兩張遼

一為魏征東將軍字文遠一為漢兗州刺史字叔高

兩秋胡

西京雜記杜陵秋胡者能通尚書善為古隸字為翟公所禮欲以兄女妻之或曰秋胡已經娶而失禮妻遂溺死不可妻也不知今之秋胡非昔之秋胡也昔魯有兩曾參趙有兩毛遂南曾參殺人見捕人以告北曾參母毛遂墜井而死者以告平原君平原君曰嗟乎天喪予矣既而知野人毛遂非平原君客也豈得以昔之秋胡失禮而絕婚今之秋胡哉

三張儉

東漢張儉山陽高平人因黨禁望門投止者一唐人字
師約太宗時為營州都督征高麗一宋真宗時契丹國
為政事令亦有此姓名

兩鄭弘

一字稚卿泰山剛人漢宣帝時為南陽太守所居民富
所去見思兄次卿為涿郡太守通法律一字巨君山陰
人第五倫為會稽守召署督郵累遷臨淮太守東漢章
帝元和初拜太尉即風類所謂微時採薪白鶴山及太

守類白鹿夾轂者是也

兩楊時

一是宋程門弟子字中立徽宗時為國子祭酒一是丹
稜人累官朝請郎

兩徐幹

一為都護班超司馬一為丞相曹操掾

兩徐邈

魏徐邈字景山武帝時為侍中晉徐邈字僊民武帝時

為中書舍人

三賈逵

一東漢人字景伯兒時常在太學人謂之賈長頭一字梁道賈充之父魏文帝時為豫州刺史凡長吏不如法者皆奏免之一宋藁城人從狄青征儂智高累官嘉州刺史元豐初拜建武軍節度使嘗請不俟郊赦贈三世官神宗曰逵武人有念親之志特聽之

三李密

晉李密字令伯以祖母老辭官後魏李密以母老習醫
又隋煬帝時有蒲山公李密字元邃嘗乘牛讀漢書與
楚公楊玄感為深交

兩張載

晉張載字孟陽為當代文宗貌極醜遊洛陽市群女以
瓦石擲之仕為著作郎宋張載字子厚為關中士人宗
師學者稱為橫渠先生

兩李益

唐有李尚書益字君虞長于詩與李賀相埒每一篇成樂工爭求之其所製征人早行等篇天下皆施之圖繪時又有宗人庶子李益同在朝故世稱尚書為文章李益庶子為門戶李益以別之

兩韓翃

唐韓翃字君平昌黎人初為侯希逸從事罷府閒居十年李勉鎮夷門辟為幕屬時已遲暮不得意多家居至德宗時一日夜半有客叩門急賀曰員外除駕部郎中

知制誥翊諤然曰誤矣客曰邸報制誥闕人中書兩進
名不從又請之曰與韓翊時有與公同姓名為江淮刺
史者又具二人進御批曰春城無處不飛花寒食東風
御柳斜日暮漢宮傳蠟燭輕烟散入五侯家與此韓翊
客曰此員外詩耶翊曰是也不誤矣

兩蔡京

唐懿宗朝有左庶子蔡京性貪虐多許時相以為有吏
才奏遣制置嶺南事為政苛慘闔境怨之貶崖州司戶

不肯之官勅賜自盡宋時亦有蔡京為奸宰相按多許
猶言與人多可也

兩周撫

晉有彭城內史周撫又王敦傳中有周撫為將者

兩王珪

唐王珪與魏徵同時宋仁宗時亦有王珪號三旨宰相

兩劉毅

一在晉武時一在晉末

兩蕭鈞

一蕭鸞子梁武時中書郎一蕭瑀從子唐太宗時率更

令

兩王渾

晉有兩王渾一戎之父為涼州刺史一濟之父錄尚書
事

兩王澄

一為衍弟字平子一為濟弟字道深

兩王愷

一晉武帝舅與石崇爭豪一安帝時丹陽尹

兩王乂

一衍父一緒父

兩張說

一唐中書令封燕國公一宋孝宗時陰柔小人張拭李
衡王希呂等論其不可執政

兩李渤

唐李渤字濬之與兄涉俱隱少室山宋李渤嘉祐進士
郡人稱為李夫子

兩張昌宗

一唐高宗初為修文館學士一則天末為春官侍郎

兩葉夢得

宋有兩葉夢得俱號石林姑蘇石林字少蘊官至宰執
貴溪石林則南渡時進士官至秘書丞知撫州

兩智永

一梁書僧一宋畫僧

兩辨才

唐有藏蘭亭序僧辨才宋亦有高僧辨才隱天竺見淮海集

兩參寥

宋有杭州僧參寥唐亦有道士參寥見孟浩然集

兩額爾克

金有兩額爾克俱為大將

改為張祿

魏范雎從中大夫須賈使於齊齊王聞其辯口私賜之金賈以為雎以國事陰告齊也歸告其相魏齊齊怒笞擊雎折脅摺齒置廁中雎佯死得出魏人鄭安平持雎亡匿更姓名曰張祿秦謁者王稽使魏載與俱歸薦之王遂為秦相封應侯

改為陶朱

范蠡事越王竟滅吳乃浮海出齊變姓名自謂鴟夷子

皮齊人聞其賢欲以為相乃間行以去止于陶自號陶朱公

改為郭禹

成汭少無行使酒殺人亡為浮屠後又入賊中為賊帥假子因改姓名為郭禹

改為韓翽

見翁壻

伯魚改姓名

第五倫字伯魚自以久宦不達將家屬客河東變姓名自稱王伯齊載鹽往來太原上黨所過輒為糞除而去陌上號為道士親友故人莫知其處

文山改姓名

見忠臣

改姓名亡匿

見報

變姓名為傭

見朋友

商記姓名

輟耕錄松江在城金世昌者出繼夏氏嘗買廢宅修葺前廳梁內有鑿成金世昌三字必昔時客商所記姓名人以為有定數云

商冒姓名

建康城南曾公大為人持重居官清廉登第之後七年六考赴班授建昌新城縣居家闕期尚隔兩年一日立

於門外忽見一人負名牌而至題曰新知建昌軍新城
縣事曾宣教公大甚駭少間有一人乘車而至問為何
官曰曾知縣也延之上坐問其諱則曰公大問其登第
之年又同曾公曰姓同名同官同而年又同此其故何
也其人起而謝曰某二於部中見此姓名注授知其履
歷故冒姓名為商耳不知為公也今當更之曾公大笑
亦不致詰問真仁人也

賜為李繼昭

唐昭宗時有孫德昭者賜姓名為李繼昭

賜為趙保吉

宋太宗時李繼遷侵擾因以李繼捧為節度使賜姓名趙保忠後李繼遷降以為銀州觀察使賜姓名趙保吉

接輿

楚狂接輿即陸通也春秋時王使聘江南通大笑不應妻曰妾與先生躬耕而食親織而衣據義而動樂亦足矣今受人重祿乘人良馬食人醲肥將何以待之通曰

吾不許也妻曰君使不從非忠也從之違義也不如去之乃與通隱匿姓名入蜀居峨眉山

夏馥

見隱士

負苓

王無功負苓傳文中子講道於白牛之溪弟子奉書北面環向成列講罷程生退省於松下語及周易薛收嘆曰不及伏羲乎何辭之多也俄而有負苓者皤皤然倚

松而見曰吾子何嘆也薛生曰叟何為者而徵吾嘆負
苓者云云負其苓而去追問之居與姓名不答文中子
聞之曰隱者也

箍桶

宋二程侍父入蜀至大慈寺有箍桶者口吟易數就揖
之輒歸質所疑酬答如響問其姓名不答徑去

江上丈人

渡伍子胥者

漢濱老父

見隱士

屠羊

陳章甫與孫員外書屠羊隱名楚王延三旌之位

牽狗

漢武帝東巡至海上羣臣言見一老父牽狗言我欲見
鉅公已而忽不見

山堂肆考卷一百四十

欽定四庫全書

山堂肆考卷一百四十一 明 彭大翼 撰

人事

命名

附雙名
婦人

禮記曰子生三月而名既冠而字名者所以正身體
定心意字者所以崇仁義叙長幼又曰君子已孤不
更名

不以山川

左桓六年九月丁卯子同生公問名于申繻對曰名有五有信有義有象有假有類以名生為信以德命為義以類命為象取於物為假取于父為類不以國不以官不以山川不以隱疾不以畜牲不以器幣是以大物不可以命公曰是其生也與吾同物命之曰同注云以名生為信若唐叔虞生而有文在手曰虞遂命之為虞是也魯成季生而有文在手曰友遂命之為友是也以德命為義若文王名昌武王名發是也以類命為象若孔

子首象尼山遂以名尼是也取于物為假若伯魚有人
饋魚因名曰鯉是也與吾同物言與我同類蓋子同生
與桓公同日也

不以子丑

白虎通殷家質直故以生日名子尚書言太甲帝乙武
丁是也不以子丑名者何也曰甲乙者幹也子丑者枝
也幹者本本實故以甲乙為名也

執手而名

禮內則子生三月妻以子見於父父執子之右手咳而名之注云咳小兒笑聲謂父作咳聲笑容以示慈愛而名之也

待事而名

唐李素立孫志遠始名鵬而素立方奉使謂家人曰古有待事名子者吾此役可命子孫矣遂改命志遠

名子僑如

晉師曠曰叔孫莊叔敗狄于鹹獲長狄僑如及虺也豹

也而皆以名其子注云得臣生子待事而名之故名宣
伯曰僑如穆子曰豹獨虺無聞

名子通國

見誕子

以蘭取名

鄭世家鄭文公賤妾曰燕姑夢天使與已蘭曰余為伯
儵而祖也以是為而子蘭有國香人服媚之以夢告文
公文與之蘭而御之遂生子名曰蘭

以藥取名

李百藥隋內史德林之子幼多疾祖母趙因取名百藥

兆亂

左桓二年初晉穆公夫人姜氏以伐條之役生太子命之曰仇其弟以千畝之戰生命之曰成師師服曰異哉君之名子也夫名以制義義以出禮禮以體政政以正民是以政成而民聽易則生亂君命太子曰仇弟曰成師始兆亂矣兄其替乎

應謠

晉桓壑字郎子聞苻堅國中有謠云誰謂堅石打碎有
子二十人皆以石為名以應之

夢碑列名

見丞相

因慶取名

賈充始生父逵曰後當有充閭之慶故名充字公閭
為子弟作名

晉柳文舒為其子弟作名皆依謙以見意故兄子默字居靜沈字處道子渾字仲玄深字道沖因作書戒之曰欲使汝曹顧名思義也

以諸生見帝

唐魏元忠始名真宰以諸生見高宗高宗慰遣之不謝卽出儀舉自若帝目送謂薛元超曰是子未習朝儀然名不虛得謂真宰相也

子厚二子名

柳子厚有二子長曰周六季曰周七子厚卒乃生

老泉二子名

蘇老泉名二子說輪輻蓋軫皆有職乎車而軾獨若無所為者雖然去軾吾未見其為完車也軾乎吾懼汝之不外飾也天下之車莫不由轍而言車之功者轍不與焉雖然車仆馬斃而患亦不及轍是轍者善處乎禍福之間也轍乎吾知免矣

慕相如改名

已下改名

顏氏家訓昔司馬長卿慕藺相如為人故改名相如東漢有朱張字孫卿許暹字顏回梁世有庾晏嬰祖孫登連古人姓名為名字亦鄙才也按長卿初名犬子

慕張綱改名

唐李綱始名暖慕漢張綱之為人改名綱

改立為昱

魏程昱本名立少時夢上天兩手捧日太祖曰卿當為朕腹心乃於立上加日而為昱

改武為乂

唐蔣乂初名武憲宗時因進見請曰陛下今日偃武修文羣臣當順承上意請改名乂帝悅時討王承宗兵方罷乂恐天子銳意於武故因以諷唐柳渾初名載朱泚亂平載奏言臣名向為賊汚且載于文從戈非偃武所宜乃更名渾

改巖為龔

南漢劉龔初名巖九年白龍見南宮三清殿改元白龍

因更名曰龔以應龍見之祥又有胡僧言識書滅劉者龔也乃採周易飛龍在天之義為龔字以名焉

改郊為庠

宋郊在翰林有指公姓名讒公者曰姓符國號名應郊天公不自安因請更名庠嘗移書葉道卿清臣稱為同年葉戲答云清臣乃宋郊榜第六人登第徧閱小錄無宋庠者不知何許人公答詩曰紙尾勤勤問姓名禁林依舊玷華纓莫驚書錄題臣向便是當年劉更生

疾讒改名

東漢劉向本名更生弘恭石顯等誣譖張堪周猛更生傷之乃著疾讒摘要因更名向

避難改名

東漢趙岐字邠卿初名嘉其祖為御史岐生於御史臺因字臺卿後避難改名岐

賜名嗣恭

已下賜名

唐路嗣恭始名劒客連徙神烏姑臧二縣令考績為天

下最明皇以為可嗣漢魯恭因賜名嗣恭

賜名玄佐

唐李希烈攻陳州劉玄佐救之希烈走遂進取汴州詔加玄佐汴宋節度使陳州行營都統玄佐本名洽至是欲尊寵之故賜今名

有功賜名

唐程日華始名華德宗以其有功改曰日華

象賢賜名

唐陸象先始名景物睿宗曰子能紹先是謂象賢乃賜
今名

賜名抱玉

見宗族

賜名應辰

宋汪應辰字聖錫本名洋紹興五年進士第一御賜今
名

剛正賜名

唐陸堅初名悌玄宗嘉其剛正賜名堅

忠義賜名

宋李世輔綏德青澗人自唐以來世襲蘇尾九族都巡使年十七隨父永奇出入行陣高宗紹興中金人犯廊延經畧使王庶募間者世輔往應募因有功遷至副將後金人陷延安欲授永奇父子官永奇泣曰我宋臣也不欲事金密戒世輔歸朝毋以我故貳其志世輔乃誘執金薩里罕馳出城至洛河金人追及之推金酋于山

崖之下世輔僅得以二十六人奔夏其父永奇卒被害
世輔竟自夏歸宋嘉其忠義賜名顯忠

同帝王名

已下同名

唐書苗晉卿子粲德宗時官至郎中陸贄欲進粲官帝
不許使人諭陸贄曰苗粲父晉卿往年攝政有不臣之
言諸子皆與古帝王同名今不欲明行斥逐其兄弟各
宜降外官贄奏曰凡是譖愬之輩多非信實之言乞勿
聽

同聖賢名

江南野史汪台符貽書宋齊丘詐之曰足下齊先聖以立名超亞聖而稱字齊丘慙而改為子嵩後齊丘使人誘台符與飲酒縛其口沈石城下按孟子序云孟子名軻字則未聞故云超亞聖而稱字又古今姓纂孟軻字子車

蔡雍顧雍

東漢顧雍字元歎蔡伯喈異之謂曰卿必成名今以吾名與卿故雍與伯喈同名又顧嘗學書於伯喈其書為

伯喈所歎故字元歎

張玄謝玄

晉吳郡太守張玄與謝玄同年名亞於謝時稱南北玄

游肇高肇

後魏游肇為廷尉時尚書高肇宣武之舅也以游名與
已同欲令改之游以孝文所賜守正不許高甚銜之

盛度丁度

歸田錄往時學士入劄子不著姓但云學士臣某先朝

盛度丁度並為學士遂著姓以別之

好好

已下雙名婦人

姓張唐人為沈著作所納

端端

姓李唐善和坊妓

愛愛

姓楊唐錢塘人

英英

唐楊虞卿妾

賽賽

姓武唐錢塘人

真真

唐柳將軍愛妓又與韓真卿通者為謝真真與鄭述古通者為沈真真

燕燕

唐張祐妾

鶯鶯

姓崔唐人與張生往來又與元稹私其與張浩然私者
為李鶯鶯

惜惜

姓毛宋高郵妓又有羅仁卿女名惜惜見女

灼灼

唐善歌之妓

盼盼

姓關唐張建封妾又宋有姓費者亦同此名黃山谷嘗
贈以詩

盈盈

姓吳唐妓女又與天寶中貴人妾同名

紫紫

古淫婦名狐所化也出名山記

紅紅

姓張唐大厯中才人

瑟瑟

姓蕭遼天祚元妃善文墨嘗作詠史詩以諷諫契丹後
被誅

瓊瓊

姓薛亦大厯中才人又宋南渡後有妓馬瓊瓊者與上
庠生朱端朝情好甚密

娉娉

姓馬卽東坡席上求詩于參寥者

東東

妓名竇鞏悼亡妓詩惟有側輪車上鐸耳邊長似叫東東

舉舉

姓鄭唐妓女巧譚謔為諸士所眷狀元孫龍光倥多惑之與同輩絳真俱為都知又酒席上每為席糾按妓中之有頭角者為都知所以分管諸妓婢追召勻齊者是也

蓮蓮

姓王字沼容亦唐妓微有風貌女弟小僊已下數輩皆不及但假母有郭氏之癖假父無王衍之嫌故諸妓皆攫金特甚詣其門者或酬酢不稱意多被盡留車服而返

住住

姓張亦唐妓女少而敏慧能辨音律與隣人龐佛奴六七歲時私有結髮之契

蘇蘇

姓王亦唐妓也頗善諧謔

心心

李心心于心心與楊柰兒袁當兒數妓者皆元初京師
之小唱也

山山

元時妓本良家子因父喪而失身資性明慧技藝絕倫
始嫁樂人李小大李沒華亭縣長哈喇布哈置於側室

凡十二年後復入樂籍

小小

姓蘇南齊人錢塘名妓或曰唐人非也又春渚紀聞宋
司馬才仲初在洛下晝寢夢一美姝牽帷而歌曰妾本
錢塘江上住花開花落不管流年度燕子銜將春色去
紗牕幾陣黃梅雨才仲詢其曲名云是黃金縷且曰後
日相見于錢塘江上及才仲以東坡薦應制舉中等遂
為錢塘幕官其廨舍後有蘇小墓在焉

當當

姓李元教坊名妓後出家

命字

附同字

禮曲禮男子二十冠而字女子許嫁笄而字郊特牲
冠而字之敬其名也

字可為氏

左隱八年衆仲曰諸侯以字為諡因以為族見前姓氏
字不若子

公羊傳氏不若名名不若字字不若子太平御覽公羊傳謂名不如字者非謂其人之名不如其字尊乃謂為人所字則近乎見尊為人所名則近乎見卑也名成乎禮字依乎名名字之本字名之末也為本故尊為末故卑婦人無名故賤於大夫野人無名故賤於學士

褒儀父

公羊傳隱公元年儀父者何邾婁之君也何以名字也曷為稱字褒之也

嘉仲孫

左閔元年齊仲孫湫來省難書曰仲孫嘉之也

字曰遙集

晉阮孚母祖姑家胡婢也其父咸通之生孚咸遺姑書曰不意今日遂生胡兒姑答曰靈光殿賦云胡人遙集於上楹便可以遙集為字咸從之

字曰方穀

唐李載義會吏民請立碑紀功詔李程為之辭未有字

詔曰周書凡厥正人既富方穀卿宜當之因以方穀為字

字曰禮闡

唐甄濟為著作佐郎兼侍御史濟生子因其官字曰禮闡又曰憲臺

字曰慶門

見外祖孫

兩孟公

已下
同字

漢陳遵字孟公時列侯有與遵同姓字者每至人門坐中莫不震動既至而非遵因號其人曰陳驚坐云

兩子夏

杜欽字子夏少好經書家富而目偏盲茂陵杜鄴與欽同姓字俱以才能稱京師故人謂欽為盲子夏以相別欽惡以疾見詆乃為小冠高廣纔二寸由是京師更謂欽為小冠杜子夏而鄴為大冠杜子夏云

兩安期

一王含子應字一王湛子產字

兩處沖

一王邃字一王湛字

山堂肆考卷一百四十一

欽定四庫全書

山堂肆考卷一百四十二

明 彭大翼 撰

誕育

誕子

附誕女
誕孫

家語孔子告魯哀公曰人始生而有不具者五焉目
無見不能食不能行不能言不能化及生三月而微
煦然後有見八月生齒然後能食三年顚合然後能
言十有六而精通然後能化陰窮反陽故陰以陽變

陽窮反陰故陽以陰化是以男子八月生齒八歲而
齠女子七月生齒七歲而齠十有四而化一陽一陰
奇偶相配又子夏問孔子曰晝生者類父夜生者類
母是以至陰主牝至陽主牡敢問其然乎孔子曰然
吾昔聞老聃亦如汝之言

懸弧

禮內則子生男子設弧於門左女子設帨於門右

弄璋

詩小雅大人占之維熊維羆男子之祥維虺維蛇女子之祥乃生男子載寢之牀載衣之裳載弄之璋乃生女子載寢之地載衣之裼載弄之瓦注云半圭曰璋瓦紡塼也

棄之隘巷

周本紀周后稷名棄其母有邠氏女曰姜嫄為帝嚳元妃出野見巨人跡心忻然悅踐之而身動如孕者居期而生子以為不祥棄之隘巷馬牛過者不踐徙置之林

中適會山林多人遷之而棄渠中冰上飛鳥以其翼薦之姜嫄以為神遂收養長之初欲棄之因名棄

禱于尼丘

按孔子其先宋人父叔梁紇母徵在姓顏少而無子禱于尼丘而生孔子生而首上圩頂故名曰丘字仲尼

繫麟

拾遺記孔子生之夜有二蒼龍自天而下二神女擎香霧于空中以沐徵在又有麟吐玉書於闕里人家云水

精之子系衰周而素王故二龍並下逸室五星降庭徵
在以繡紱繫麟角而去及夫子將終抱麟解紱而哀之
未幾孔子卒

饋鯉

家語孔子年十九娶于宋之上官氏女一歲而生伯魚
伯魚之生也魯昭公使人遺之鯉夫子榮君之賜因以
名其子為鯉字伯魚年五十先孔子死伯魚生伋字子
思子思生白字子上子上生求字子家

驚母

左隱元年初鄭武公娶于申曰武姜生莊公及共叔段
莊公寤生驚姜氏故名寤生遂惡之愛共叔段或云杜
氏傳注寤生謂寤寐而莊公已生此說非也果如此自
當喜何得復驚而惡之史記謂寤生生之難是也難生
故武姜困而後寤因寤而驚

宜父

五代和現晉宰相和凝之子現生會凝入翰林加金紫

知貢舉凝喜曰我平生美事三者并集此子宜於我矣
因名曰三美又李白生子詩揚杯祝願無他語謹勿頑
愚似汝爺似爺亦可對驚母

香蘭

見命名又唐張志和母夢楓生腹上遂生志和

秀草

傳燈錄西域有七枝秀草若羅漢聖人生則此草生清
淨之地第三祖和修生時九枝秀草應時而生

鹿入胎

小說老子乘白鹿入母胎既生廣顙大目疎齒方口耳有三門鼻有雙柱足蹈五字手把十文

犬銜卵

博物志徐君宮人有孕生卵以為不祥棄于水濱孤獨老母有犬名鵠蒼獵於水濱得所棄卵銜以歸母母以為異覆煖之遂成小兒生時正偃故以為名長而仁智襲君徐國後鵠倉臨死生角而九尾實黃龍也偃王葬

之徐梁界內

鄰母收

洞冥記東方朔父張夷母田氏朔生三日而田氏亡時漢景帝三年也鄰母收養之生時東方始明因以姓焉朔生五歲忽失所在經年乃歸母見大驚曰汝行經年一歸何以慰我耶朔曰兒暫之紫泥海海有紫水汚衣仍過虞泉湔浣朝發中還何言經年乎

胡婦產

漢蘇武留匈奴十九年年老子前坐事死宣帝憫之問
左右曰武在匈奴久豈有子乎武因思平侯白前發匈
奴時胡婦適產一子名通國有聲問來願因使者致金
帛贖之上許焉及通國至上以為郎

虎乳

左宣四年初若敖娶於邲生鬬伯比若敖卒從其母畜
於邲淫於邲子之女生子文焉邲夫人使棄諸夢中虎
乳之邲子田見之懼而歸夫人以告遂使收之楚人謂

乳穀謂虎於菟故命之曰鬪穀於菟以其女妻伯比實為令尹子文

馬噓

魏略北方有橐離之國其主侍婢無夫有身王欲殺之婢云有氣如雞子從天而下故我有身後生子王捐之于溷中猪以喙噓之徙馬閑馬以氣噓之王疑以為太子令其母收畜之名曰東明常令牧馬東明善射王恐奪其國欲殺之東明走南至奄水以弓擊水魚鼈浮于

橋東明得渡追兵不及東明因都王夫餘之地

有文

左昭元年子產曰當武王邑姜方娠太叔夢帝謂己余命而子曰虞將與之唐及生有文在手曰虞遂以命之又左昭三十二年史墨曰昔成季友桓之季也文姜之愛子也始震而卜卜人曰生有嘉聞其名曰友為公室輔及生如卜人之言有文在其手曰友遂以名之

無影

見斷刑

神光照社

東漢應樞生四子見神光照社樞以問卜者曰此天符也子孫其興乎樞于光處探之得黃金自是諸子宦學有名至瑒七世通顯

流星墜盆

晉桓玄溫之孽子也母馬氏嘗與同輩夜坐月下見一流星墜銅盆中忽如二寸大珠炯然明淨以瓢接取馬

氏得而吞之遂有孕生子

夢吞霞光

李老君之母玉女嘗晝寢夢五色霞光入戶結如彈丸
流入玉女口中吞之遂有孕

夢服日精

劉元海之父豹妻祈子于龍門有大魚二角躍鱗而出
其夜夢所見魚化為人抱一物授其妻曰此是日精服
之生貴子自是懷孕十三月生元海

一匹練

見長人

五色珠

樂史字子正母夢吞五色珠而生及長有文詞初仕江南後歸宋舉進士獻金明池賦召為三館編修

藍田生玉

吳諸葛恪少有名孫權見其父瑾曰藍田生玉真不虛也

泗濱得石

高琳字季珉其母嘗被襖泗濱見一石光潤持以歸是夜夢人告之曰石是浮磬之精保之必生令子後生琳周文帝朝位上柱國

豺狼聲

左昭二十八年叔向欲娶申公巫臣女其母止之曰甚美必有甚惡叔向懼不敢娶平公強使娶之生子伯石伯石始生子容之母走謁諸姑曰長姒生男姑視之及

堂聞其聲而還曰是豺狼之聲也狼子野心非是莫喪
羊舌氏矣遂弗視

天人貌

關令尹喜生時陸地生蓮花光色鮮盛眼有日精垂臂
下膝堂堂有天人之貌

公衍先生

左昭二十九年公衍公為之生也其母偕出公衍先
生公為之母曰相與偕出請相與偕告三日公為生其

母先以告公為為兄昭公私喜于陽穀而思於魯曰務人為此禍也且後生而為兄其誣也久矣乃黜之而以公衍為太子注云公衍公為皆昭公子相與偕出言二母同出產舍也私喜於陽穀者本年公使公衍獻玉于齊侯齊侯喜以陽穀之邑與衍也思于魯者追思失魯之禍也務人為此禍者務人即公為言公為始與公若謀逐季氏而致此禍也

陽邁初孕

宋書南海扶南王陽邁初在孕其母夢生兒有人以金
席藉之其色光麗夷人因謂金之精者為陽邁

賜犬

越語越句踐令壯者無娶老婦令老者無取壯妻女子
十七不嫁丈夫二十不娶其父母有罪有得媿者以告
公令醫守之生丈夫二壺酒一犬生女子二壺酒一豚
生三人公與之母生二人公與之餼注云母乳母也

贈龜

宋梅聖俞生男前一日夢道士贈龜一枚故聖俞和永叔洗兒詩夜夢有人衣帔幌水邊授我黃龜兒明朝我婦忽在蓐乃生男子實秀眉

范母如廁

范曄母如廁產曄額為磚所傷故以磚為小字

王母遷樓

青箱記宋王欽若父仲華侍祖郁任官鄂渚欽若母有孕值江水暴溢亟遷黃鶴樓始免身生公時隔岸漢陽

居人望樓上若有光景

陶母夢日

雲笈經陶隱居初生母夢日精在懷二天人手執金香
爐來至其所因而有孕

李母夢星

唐李太白母夢長庚星入懷而生太白又蕭何感昴星
之精張良感弧星之精樊噲感狼星之精而生

香水盆

唐崔侍御生子三日白樂天送之詩曰洞房門上掛桑
弧香水盆中浴鳳雛還似初生三日魄嫦娥滿月卽成
珠

湯餅會

生子三朝會曰湯餅會唐劉禹錫送張盥詩曰憶爾懸
弧日余為坐上賓引筯舉湯餅祝詞天麒麟宋蘇軾賀
陳述古弟生子詩剩欲去為湯餅客惟愁錯寫弄麀書

黃氣入口

酉陽雜俎老君母曰玄妙玉女天降玄黃氣如彈入口而孕凝神瓊胎宮三千七百年赤明開運歲在甲子誕於扶刀蓋天西那王國鬱寥山丹玄之阿

赤文隱背

符堅母苟氏祈子于西門豹祠其夜夢與神交有孕生堅生時有神光自天燭其庭背有赤文隱起成字曰草符臣

陳妻繞井

博物志陳成初生十女苦之使妻繞井三匝祝曰女為
陰男為陽女多災男多祥後果得孕生男又云婦人妊
身三月未滿著壼衣冠平旦繞井三匝映水視影勿反
顧必生男

竇母渡河

北齊竇泰母有娠期而不產大懼有巫云渡河湔裙必
易生因至水所忽一人云當生貴子還家生泰

持賀兩家

史記盧綰者豐人也與漢高祖同里盧綰親與高祖太
上皇相愛及生男高祖盧綰同日生里中持羊酒賀兩
家及高祖盧綰壯俱學書又相愛也里中嘉兩家親相
愛生子同日壯又相愛復賀兩家羊酒注云親謂父也

普賜羣臣

世說晉元帝生子普賜羣臣殷羨謝曰臣無勲猥蒙頒
賚帝笑曰此事豈可使卿有勲又南唐時宮中嘗賜洗
兒果有近臣謝表云猥蒙寵數深愧無功李主曰此事

卿安得有功

頭玉

李賀詩頭玉硤硤眉刷翠骨重神寒天廟器一雙瞳子
剪秋水竹馬梢梢搖翠尾

掌珠

杜甫寄漢中王生子詩掌中探得一珠新白樂天詩掌
珠一顆兒三歲鬢雪千莖父六旬又云玉牙珠顆小男
兒羅薦蘭湯浴罷時

母夢墜鈴

梁任昉字彥升父遙仕齊為中散大夫母裴氏夢五色綵旗四角懸鈴一落入懷中遂有娠生昉八歲能屬文褚彥回謂遙曰卿有令子所謂百不為多一不為少

父夢積笏

宋章得象字希言生時父夢庭積象笏因以得象為名

緇郎

南部新書崔慎由鎮西川有異人曰君四十無子為公

求之終南翠微寺有僧絕粒五十年君遺以服玩受之
則其嗣也果受之僧尋卒遂生子字曰緇郎卽崔徵
也又宋宋祁父玘為應山令夢人遺文選一部而生祁
故小字選郎

玉童

湘山野錄相國王公丙申歲為譙幕值歲饑亡者數千
戶公奏乞貸種粒牛糧懇訴甚切朝廷可之一夕次驛
舍夢中有一人召公出拜見一人紫綬象簡如牧守之

儀遣一綠衣小童曰以女有憂民之心上帝嘉之賜此
童為宰相子授訖寤是夕夫人亦有祥兆而孕焉後果
生一子乃慶之也器格清粹能談紫府間事祥符壬子
歲謂所親曰上元夫人命我為玉童只為吾父未受相
印受則吾去矣不數日公果正拜及踰月慶之卒

鶴雛

宋楊大年初生母章氏夢羽人自言武夷仙君託化既
生乃一鶴雛盡室驚駭棄之江叔父曰吾聞間世之人

其生必異追視之則鶴蛻而嬰兒具焉體尚有毛其長盈尺經月乃落

蛇蛻

邵氏聞見錄宋崇寧中大將劉法將生其母帷帳忽墜壓而下視之一大蛇蛻蛻母怖甚避之他所及法生再視之但見蛇蛻耳又漢竇武母產子並產一蛇

釋氏抱送

杜甫徐卿二子歌君不見徐卿二子生絕奇感應吉夢

相追隨孔子釋氏親抱送盡是天上麒麟兒大兒九齡
色清徹秋水為神玉為骨小兒五歲氣食牛滿堂賓客
皆回頭吾知徐公百不憂積善滾滾生公侯丈夫生兒
有如此二雛者名位豈肯卑微休按尸子曰虎豹之駒
雖未成文已有食牛之氣

道士來謁

楊大年父文逸為唐玉山令大年將生一道士袖刺來
謁自稱懷玉山人冠褐秀爽斯須遽失公遂生後三十

七為學士晝寢於玉堂道士來謁稱懷玉山人故出一牒閱之寫三十七字大年驚曰得非數乎許添乎道士命筆一點為四十一字至其數果卒

婦人擎盤

夷堅志翟揖年五十無子繪觀音像以祈子其妻夢白衣婦人以盤擎一兒授之遂生兒

道士授棋

李泰伯母初無子祈禱無所不至祥符二年夢道士奕

棋戶外往觀之其一人取局之一子授焉遂孕生泰伯
祈魔母室

廣記觀察使皇甫政與妻陸氏住魔母室祈男請俸錢
百萬結構堂宇後果生男

告張仙像

蜀蘇洵天聖中至玉局觀見一畫像云是張仙神也無
子者禱之輒應洵尚無子因解玉環易之每露香以告
乃生軾輒皆成大儒洵自為像贊一說世傳張仙像乃

蜀王孟昶挾彈圖也因王花蕊夫人入宋宮念其故主
偶攜此圖懸于壁且祀之謹一日太祖幸而見之致詰
焉夫人詭對曰此蜀中張仙神也祀之能令人有子此
夫人一時欺宋祖之言非實有所謂張仙也老泉時去
孟蜀不遠乃不知有此事何耶

犀兒

蘇東坡詩未得豐盈犀角兒先逢玉雪王郎子又云眼
中犀角真吾子身後牛衣愧老妻又云我有長頭兒角

頰峙犀玉四歲不知行抱負頰背腹師來為摩頂起走
趁奔鹿按鄭語史伯言幽王棄高明昭顯而好讒慝暗
昧惡犀角豐盈而近頑童窮固注云犀角謂頭角有伏
犀豐盈謂頰輔豐滿皆賢明之相也童昏也固陋也謂
皆暗昧窮陋不識德義也故東坡詩句中豐盈犀角之
語蓋出於此

驥子

黃魯直賀夷仲叔父幼子晬日詩骨秀已知驥驥子性

仁端是鳳凰，雖不騰渥水，稱神俊，應出岐山作瑞符。
漸詣家人知姓氏，試看屏上識之無。乃翁斷獄多陰德，徑作高門待汝車。

鳩宿戶

唐王廷湊始生有鳩數十朝集庭樹，暮宿簷戶，及長，駢脇歷居戎職，值亂殺田弘正，推為留後，子孫相繼藩鎮一百年。

鶴集庭

唐張九齡母夢九鶴自天而下集於庭遂生九齡

夢鳳集肩

南史徐摛之子陵母臧氏夢五色雲化為鳳集左肩已而誕陵時有僧寶誌上人者世稱有道陵年數歲家人攜以候之寶誌摩其頂曰天上石麒麟也又南史王曇逸母晝寢夢靈鳳集其身因有娠又聞腹中啼聲寶誌曰生子當為神仙宗伯又唐王遠知母晝寢夢鳳集身因有娠宋段少連字希逸初生時其母夢鳳集于庭

夢燕投懷

定命錄唐張說母夢玉燕投懷遂生說

白鵠聳雲

拾遺記吳時張承之母孫氏懷承之時鄰人相謂曰昨見張家有白鵠從室入雲承之母使占之占者曰鵠延年之物從室入雲自卑升高之象當使子孫位極人臣名擅江表若生子可名白鵠後承之位至丞相輔吳將軍

異雀鳴樹

唐崔信明以五月五日生日方中有異雀鳴集庭樹占者曰生子當以文顯位殆不高貞觀中為秦川令卒

夢虜脫衣

索克夢虜脫上衣索統曰虜字去其上乃一男字夷狄陰類也君婦當生男果然

夢神與羹

邵氏聞見錄邵康節母李氏其姑張氏遇之甚嚴一夕

欲自盡夢神人令以玉筋食羹一盃告曰無自盡當生
佳兒後李夫人因山行於雲霞間見一黑猿有感而娘
臨娩有慈烏滿庭人以為瑞是生康節七歲戲於庭蟻
穴中別見天日雲氣往來也

履巨石

隋文中子母銅川夫人經山梁履巨石而有娠遂生文
中子

立蓐室

宋李顯忠初生卽立于蓐室有火光及長勇力絕人

英骨

晉桓溫未晷溫嶠見之曰此兒有英骨可試使啼及聞其聲曰真英物也溫父彝以兒為溫所賞故名曰溫

神光

安祿山母禱於軋葦山即所謂鬪戰神者旣而有娠及生有光照穹廬野獸盡鳴望氣者言其祥范陽節度使張仁愿遣搜捕欲殺之匿而免母以神所命遂字軋葦

隨母嫁虜將安延偃遂冒姓安後歸唐更名祿山

獮入室

富獻簡公曰王荊公之生也有獮入室俄失所在後小名獮郎

象入門

傳燈錄第十祖脇尊長者生時父夢白象入其門背有寶座座上有明珠

東坡洗兒詞

蘇東坡賀洗兒詞犀錢玉果利市平分霑四坐自愧無
功此事何如到得儂按犀角黃錢色似之故曰犀錢果
白於玉故曰玉果吳人自稱曰儂

永叔洗兒歌

歐陽公洗兒歌虎兒可愛光陸離開眼已有百步威按
許慎曰陸離美好貌

雞飛

已下
誕女

翰府名談西子母浣帛於溪有明珠射體感而孕又夢

翠雞五色自空飛下久而化為鸚飛去遂生西施

雉

酉陽雜俎武則天初誕之月雌雉皆雉右手手中指有黑
毫左旋如黑子引之長尺餘聞見錄歐陽公在夷陵遊
姜嫄廟潛禱續嗣家人夢一鶴飛來自云雌鶴果得女
甚端麗

作門楣

唐玄宗寵楊妃當時謠曰生女勿悲酸生男勿喜歡又

曰男不封侯女作妃君看女却是門楣

傾邦國

杜甫錦樹行生男墮地要膺力生女富貴傾邦國

長枝

已下
誕孫

白樂天詩茱萸春來盈女手梧桐老去長孫枝注云言
既老則有子孫亦如梧桐之老而有孫枝

立竹

蘇東坡詩如今未問老與少兒孫森森如立竹


驚目

蘇子瞻賀子由生第四孫詩今日散幽憂彈冠及新沐
況聞萬里孫已報三日浴朋來四男子大壯泰臨復開
書喜見面未飲春生腹無官一身輕有子萬事足舉家
傳吉夢殊相驚凡目爛爛開眼電礲礲峙頭玉但令強
筋骨可以耕衍沃不須富文章端解耗紙竹君歸定何
日我計久已熟長留五車書要使九子讀筆瓢有內樂
軒冕無流矚人言适似我窮達已可卜蚤謀二頃田莫

待八州督

開顏

程伊川文集祖評事平生未嘗見笑惟長孫始生一老
嫗報曰承旨新婦生男微開顏曰善視之



山堂肆考卷一百四十二